

# Xojon carta-la San Pablo xi ma-ne jò xi kiskiì-la xita naxandá-la Cristo xi títsajna Corinto

Kó tsò Pablo nga síhixat'aà jñà xita  
naxandá-la Cristo xi títsajna Corinto

**1** <sup>1</sup>'An, Pablo, tìsikasén-nò xojon jè, nga k'oaá s'ín kjòmejèn-la Nainá nga 'an tsibíxáya-na Cristo Jesús. 'An, kò 'ndsè Timoteo tìtsanikasén-nòjen xojon jè. Tìtsanìhixot'aà-nòjen jñò xi xita naxandá-la Nainá 'mì-nò xi títsajnaà ya naxandá Corinto, kò ngats'iì xita tsjeè-la Cristo xi títsajna kóhokji nangui Acaya. <sup>2</sup>Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya jjiin inima-nò.

Kó tsò Pablo nga tsjá-la kjondaà Nainá

<sup>3</sup>Ndaà kàtayaxkón Nainá xi Na'èn-la ma Jesucristo xi otíxoma-ná. Jè Nainá xi Na'èn-ná ma, tse kjohimatakòn tjín-la it'aà tsaján. Kò jè, kjit'aà naxchrjein síje takoán. <sup>4</sup>K'e nga mé kjo'in títsajnajñaá, jè Na'èn-ná síjetakòn-ná mé-ne jñá, k'oaá tìs'ín síjetakoán xinguiáá xi tìkoa kjo'in títsajnajjiin koni s'ín kisìjetakòn-ná Nainá. <sup>5</sup>Koni tjín kjo'in xi tse nìkjiaán xi kjoa ts'e Cristo, k'oaá tìs'ín tse kjojetakòn sakó-ná it'aà ts'e Cristo. <sup>6</sup>Ngajen, tsà kjo'in títsanìkjeiín-jen, kjondaà tsajòn-nò nga s'e-nò kjojetakòn, koa kítjokàjñòd kjo'in. Tsà Nainá síjetakòn-najen, jè-né nga tìkoa jñò s'e-nò kjojetakòn, koa kichìkjoa kò-nò kjo'in xi jin títsanìkjeiín-jen. <sup>7</sup>Tjín kixíí kjoa xi chiñà-lajen it'aà tsajòn. Tíjiin-najen, koni s'ín tíhokot'aà-nò kjo'in

xi titsanìkjeiín-jen, k'oā tìs'ín okot'aà-nò kjojetakòn xi tjin-najen.

<sup>8</sup>Jñò 'ndsè kò tichjaá, mejèn-najen nga kàtasijiin-nò kjo'in xi kis'e-najen ján nangui Asia. Tse jchán kjo'in kinìkjeiín-jen. Jyeé mì tì kii kichìkjoako-nájen skanda mì tì kii bixón-najen tsà kitsajnakon ìsa-jen. <sup>9</sup>K'oaá s'ín komà-najen nga jyeé-la tjinè-la nga kiyá-jen. K'oaá s'ín komà'in-jen mé-ne nga ìsa ndaà kjót'aà takòn-najen Nainá xi ma-la síkjaáya-la mik'en, nga mì tà yijo-najen kjót'aà takòn-jen. <sup>10</sup>Nga jyeé kjomeé k'en-jen, tanga Nainá tsasiko-najen nga kisikatojiin-najen kjo'in kò tákó sìkatojiin-isa-najen kjo'in. Kò k'oaá s'ín kjit'aà takòn-jen nga jè sìkatojiin ìsa-najen nità mé kjoa-ne. <sup>11</sup>Jñò, mochjeén-né nga sìchját'aà-nájen nga kinókjoat'aà-là Nainá it'aà tsajen mé-ne nga ìsa kjin koma-ne xita xi kichjat'aà-la Nainá, tikoá kjin koma xita xi tsjá-la kjondaà Nainá koni s'ín machikon-t'in-jen.

### Mé-ne mìkii kii-ne Pablo ján Corinto

<sup>12</sup>Tjín jngod kjoa nga ndaà nìkìtsajna-jen yijo-najen. K'oaá s'ín beè-lajen takòn-jen nga it'aà ts'e Nainá nchrobá-ne nga tsjeé kò kixi tihonguíko-jen yijo-najen i isò'nde, kò jè tjina ítjòn it'aà tsajòn. Mìtsà kjoachjine-la xi taxki xita nga k'o'nè-jen, kjondaà-la Nainá-né. <sup>13</sup>Mìtsà kje'ei kjoa nga titsachjiin-nòjen, ta jè-né nga kixkejñòd kò kjoas'en-jiin-nò koni tsò 'én xi tjt'aa xojon jè. K'oaá s'ín majngod takoàn nga nguì ndaà kjiya-nò <sup>14</sup>koni s'ín jye kjòch'iya chiba-nò nga tsja kàtama-nò it'aà tsajen kò nga tikoá tsjaá koma-najen it'aà tsajòn k'e nga kjoí ìjngod k'a Jesucristo xi otìxoma-ná.

<sup>15</sup>'An, jyeé ndaà t'jngod takoàn it'aà ts'e kjoa koi, k'oaá ma-ne nga k'oas'ín kiskoòsòn-la nga jò k'a kjìkon-nò mé-ne jñò, jò kjondaà sàkò-nò. [Tanga mì k'oaá s'ín tsitasòn.]

<sup>16</sup>K'oaá s'ín kisikìtsjeèn, k'e nga kiaà nangui Macedonia nga ya jahato ítjòn-nò. Tjín-nè nga kjoahato ìjngod k'a-nò k'e nga kjinchrobà-na mé-ne jñò koma sìchját'aà-ná nga kjián nangui Judea. <sup>17</sup>K'e nga k'oas'ín kiskoòsòn-la, ¿a k'oaá s'ín kinìkìtsjeèn nga 'an, tìsìskáko-nò? Majin, nga mì k'oaá s'ín s'iaàn koni s'ín xi taxki xita isò'nde. Mìtsà ítjòn xan-nò: “Koma-né”, kò tik'e-ne ìjngod k'a xan-nò: “Mikiì koma.” <sup>18</sup>Tíbeè Nainá; 'én kixi xi kixan-nò, ngajen, mì k'oaá s'ín nokjoà-jen nga bixón-jen:

“Jon, koma-né”, ko “Mikii koma.” <sup>19</sup>Timoteo, Silvano ko 'an, k'oaá s'ín nokjoàyajìin-nòjen it'aà ts'e 'én-la Jesucristo xi ki'ndí-la Nainá. Tsjin-la 'én xi tsò jon ko majìn. Nainá jngoò k'a s'íkitasòn it'aà ts'e Cristo nga tsò: “Jon, koma-né.” <sup>20</sup>Ngats'iì 'én xi chja Nainá koni s'ín tsjá tso'ba, it'aà ts'e Cristo bitasòn yije-né. Nga jè Cristo xi tsò “koma-né”. Ko it'aà ts'e Cristo, jñá bixón-ná: “K'oas'ín kàtama”, mé-ne jeya k'ijna-ne Nainá. <sup>21</sup>Jè Nainá, xi s'íkixiyandaà-ná nga jè titsajnakoaá Cristo [xi xó jaàjìin-ne Nainá], tikoáá jñá xó jaàjìin-ná Nainá. <sup>22</sup>Ko tijè-ne Nainá xi tsibít'aà chiba-ná koni jngoò sello; kisikíjnajiìn inima-ná jè Inima Tsjeè-la xi tjoé ítjòn-ná nga kixi kjoa nga tikoá tjoé yije-ná kjondaà xi tjíndaà-la nga tsjá-ná.

<sup>23</sup>Tíkotsejèn Nainá, jè tíbeè inima-na, mé-ne kj'eè kii fi-na Corinto koni s'ín tíjìin-na; koií kjoa-la, majìn-na nga 'on koma-la inima-nò nga 'én ts'en kichjàko-nò. <sup>24</sup>Ngajen, majìn-nòjen nga ngajen, kjo'ño kotixoma-nòjen it'aà ts'e 'én xi mokjeiín-nò. Ta saá nichját'aà-nòjen mé-ne nga s'e-nò kjotsja nga kixi titsajnaà koni s'ín mokjeiín-nò.

**2** <sup>1</sup>K'oaá ma-ne nga k'oas'ín kiskoòsòn-la nga mì tì kii kiìkon-nò. Majìn-na nga ba kitsajnaà. <sup>2</sup>Tanga tsà 'an, ba s'íkítsajna-nò, nga koma iskan, mì tì yá tjín-ne xi siìtsjako-na, nga jñò, jyeé ba titsajnaà. <sup>3</sup>Koií xá jye kiskii jngoò-nò xojon, mé-ne k'e nga k'ijchokon ijngoò k'a-nò nga mì ba s'íkijna-ná nga mochjeén-né nga jñò siìtsjako-ná. Nga k'oaá s'ín tíjngoò takoàn, 'an, matsja-na tikoá jñò, matsjaá-nò. <sup>4</sup>K'e nga k'oas'ín kiskii-nò, ndaà jchán kokájno-la inima-na, baá kis'e-na skanda ndáxkoaàn tsibíxteèn. Tanga 'an mìtsà koi xá kiskii-nò nga kàtaba-nò. Jè-né nga jchaa nga 'ño matsjake-nò.

**Kó kitsò 'én xi kiichja Pablo it'aà ts'e xita xi tsohótsji jé**

<sup>5</sup>Jè xita xi tsohótsji jé, mìtsà ta 'an xi ba kisikíjna-na, mejèn tsà ba kisikítsajna ngats'iì xita naxandá-la Cristo. Tà k'oaá xan-nò nga mì koto chiba-la koni s'ín tixan-nò. <sup>6</sup>Nga k'jìn ma-nò xi tsibìnè-là kjo'in jè xita jè; jyeé ndaà tjín, ta koma-ne. <sup>7</sup>I'ndeji, jè xi s'een nga sijchàat'aà-là jé-la; sijetakòn xita jè, mé-ne nga mì k'jòba kiyájiìn-ne. <sup>8</sup>K'oaá ma-ne nga bìtsi'bà-nò nga ndaà jchibàya-nò nga ijngoò k'a titsjacha xita jè. <sup>9</sup>Tikoá koií xá kiskii-nò it'aà ts'e kjoa koi, mejèn-na skot'aà-nò, a kixií kjoa nga ma-nò n'íkitasòn yije. <sup>10</sup>Jè xita xi jñò n'ijchàat'aà-la



*Xojoón tǐbǐndaà Pablo xi kisikasén-la xǐta naxandá-la Nainá*

jé-la, tǐkoáá 'an siǐjchàat'aà-la. Tsà mochjeén-né nga 'an siǐjchàat'aà-la xǐta jè, 'an jyeé kisǐjchàat'aà-la xi kjondaà tsajòn ko tǐbeè Cristo. <sup>11</sup>Mé-ne jè xǐta neǐí mikìl koma jè siǐkijne-ná, nga jyeé ndaà 'yaá kjoamaña-la kós'ín síxá.

### **Kó komà-la Pablo nga mikìl kisatiikjoè Tito ján Troas**

<sup>12</sup>K'e nga ijchoa ján naxandá Troas, nga kichjàya 'én ndaà-la Nainá xi kjoa ts'e Cristo, it'aà ts'e Na'è-ná kitáx'a'nde-na nga kisixákoaa 'én ndaà-la Nainá. <sup>13</sup>Tanga mikìl ndaà kis'e-la inǐma-na nga mikìl kiskaajñaà jè 'ndsé Tito. K'oaá komà-ne kisikítsajna jña xǐta xi ya i'nde-la, ikjoàn kiaà ján nanguí Macedonia.

### **Mé kjoa-ne nga jè Pablo tsjá-la kjondaà Nainá**

<sup>14</sup>Ndaà chǐj-la Nainá nga it'aà ts'e Cristo fiko-najen k'e nga okó-lajen jña xǐta isò'nde nga jye kisikijne. It'aà tsajen k'oaá s'ín obísòn kjohítsjeèn-la Nainá xi kos'ín ngaya-la koni jngoò

jta-la tsojmì xi 'nó ndaà jne, mé-ne nga skoe-ne jñà xita nita ñánda-ne nga títasajna. <sup>15</sup> It'aà tsajen k'oaá s'ín ngaya-la koni ni'ndi-la chrjóngó-la Nainá, k'e nga jè Cristo tsját'aà-la Nainá. K'oaá s'ín bijchókajiiin-la jñà xita xi bitjokàjiiin kjo'in ko xita xi chija. <sup>16</sup> It'aà ts'e jñà xita xi chija, [k'e nga beè-najen nga bènojmiya-jen 'én-la Nainá], k'oaá s'ín ch'o jne-la koni jngod jta xi sík'en-ná. Tanga jñà xita xi bitjokàjiiin kjo'in, k'oaá s'ín ndaà jne-la koni jngod jta xi síkíjnakon-ná. It'aà ts'e xá koi, nijngod xita chíkjoa-la nga síkitasòn xi ta kjohítsjeèn ts'e. <sup>17</sup> Ngajen, mikii k'oas'ín 'nè-jen koni s'ín xita xi kj'eíí xi chjaya 'én-la Nainá nga ton síkijne. Ngajen, 'én kixíí nokjoà-jen. Nainá tíbeè-ne nga jè kisikasén-najen ko nga'ño ts'e Cristo-né nga nokjoàya-jen, nga jè Cristo títasajna-ko-jen.

### Xá-la Nainá xi kjoa xitse

**3** <sup>1</sup> K'e nga k'oa'mì-nòjen kjoa koi, ¿a bits'ia ijngod k'a-jen nga ndaà níkítasajna-jen yijo-najen? Jñò, ¿a k'oaá s'ín níkítajeèn nga mikii tíj'nde-na nga ma sixá tsà tsjin-na xojon xi jñò k'oi-ná, o xi kj'eíí xita tsjá-na koni s'ín síjé xita xi kj'eíí? <sup>2</sup> Majin, jñò sobà-nò xi xojon-najen ma xi tíjiiin jiiin inima-najen. Ngats'ii xita beè-né koa bíxkejiin-né. <sup>3</sup> K'oaá s'ín ndaà 'ya-jen nga jñò-nò xi koni xojon-la Cristo xi it'aà tsajen kitjei. Jngod xojon carta xi mìtsà tinta kitjei-ne; koó Inima Tsjeè-la Nainá xi tíjnakon kitjei-ne; mìtsà ndajo kitjeit'aà; yaá kitjeit'aà yijo inima-la xita.

<sup>4</sup> Kjoa koi, k'oaá s'ín makixiya nga it'aà ts'e Cristo mokjeiín-najen it'aà ts'e Nainá. <sup>5</sup> Xi ta nga'ño tsajen tsjin-najen kjohítsjeèn mé xi s'en-jen. Tanga jè Nainá tsjá-najen kjohítsjeèn k'e nga mé xi 'nè-jen. <sup>6</sup> Jè Nainá tsjá-najen kjohítsjeèn nga chí'nda-la ma-jen mé-ne nga koma kinókjoaya-najen it'aà ts'e kjondaà xitse xi Nainá tsbíndaàjiiin-ko jñà xita. Mìtsà kjoa ts'e kjotíxoma xi xojon tíjt'aà, ts'eé Inima Tsjeè-la Nainá. Jè kjoa xi ts'e kjotíxoma sík'en-ná nga nguixkon Nainá, tanga jè Inima Tsjeè-la Nainá síkíjnakon-ná.

<sup>7</sup> Jè kjotíxoma xi kitjoé-la Moisés xi ndajo kitjeit'aà, kjoa biyaá j'iiko. Tanga k'e nga sa kitjoé ítjòn-la kjotíxoma jè, k'oaá s'ín ki'ya-la kjoa jeya-la Nainá. Jè Moisés, k'e nga j'i-ne nga kii mijin-jno nindoò, jñà xita Israel mikii komá

kiskod'an Moisés nga 'nó ote ni'ín kji isén-la; tanga xi komà iskan, chaán kichijà xi ote kji isén-la. Tsà k'oaá s'ín kis'e-la kjoajeya, jè kjoa xi tjinè-la nga chija, <sup>8</sup>isa jeya tjin kjondaà xitse xi tsjá-ná Nainá k'e nga tsjá-ná Inima Tsjeè-la. <sup>9</sup>Nga jeya j'iì jè kjotíxoma xi kjoa biyaa tsibínè-ná, isaá 'nó jeya kítasòn 'én xi nokjoàya-jen nga xita kixi síkítsajna-ná Nainá. <sup>10</sup>Nas'ín 'nó kis'e-la kjoa jeya jè kjotíxoma xi jye tsato, tanga mikii mangásòn-ko jè kjoajeya xi tjin-la kjondaà xitse; isaá 'nó jeya tjna. <sup>11</sup>Tsà jè kjoa xi tíchijangui kis'e-la kjoa jeya, isaá jeya tjin kjoa xitse xi mì tì kiì chija-ne nità kjé-ne.

<sup>12</sup>Nga tjangòò takòn-jen nga titsachiñá-lajen kjoa koi, k'oaá ma-ne nga mikii masobà-najen nga nokjoá-jen. <sup>13</sup>Mìtsà k'oas'ín 'nè-jen koni kis'iin Moisés nga nikje tsibíjtsa isén-la, mé-ne nga jñà xita Israel mikii komà kiskod'an-ne nga jye tíchijangui xi ote kji isén-la. <sup>14</sup>Tanga jñà xita Israel kjòtájàjiiin kjohítsjeèn-la. Skanda nachrjein i'ndeì, k'e nga bíxkejiin Xojon-la Nainá xi tjit'aà kjoa jhínga xi tsibíndaàjiiin-ko xita, tákó k'oaá s'ín ma-la koni tsà nikje xoba kijtsa kjohítsjeèn-la. Ta jngòò it'aà ts'e Cristo koma tjáxin nikje jè. <sup>15</sup>Skanda nachrjein i'ndeì, jñà xita Israel, k'e nga bíxkejiin xojon xi kiskii Moisés, tákó k'oaá s'ín ma-la koni tsà nikje xoba tjttsa'ma kjohítsjeèn-la. <sup>16</sup>Tanga k'e nga jngòò xita síkjahatjìya-la kjohítsjeèn-la nga fit'aà-la Na'èn-ná xi otíxoma-ná, tjáxin-la nikje xoba xi tjttsa'ma kjohítsjeèn-la. <sup>17</sup>Nga jè Na'èn-ná, jè sobà-né xi Inima Tsjeè-la Nainá. Ya ñánda tjna Inima-la Na'èn-ná, jñà xita títsajnandeìí-né kjoa ts'e kjotíxoma. <sup>18</sup>Ngats'iaá jñà mì tì nikje xoba tjttsa'ma-ne kjohítsjeèn-ná. It'aà tsaján k'oaá s'ín ngaya-la koni jngòò chítstín xi ma chítsejèn-yá xi okó kjoa jeya-la Na'èn-ná. Kjit'aà nachrjein isa jeya tíhotsejèn koni kji Na'èn-ná nga jè Inima Tsjeè-la tísíkatjìya-ná.

**Kó s'ín síhiseèn-ná jè 'én ndaà-la Nainá xi kjoa ts'e Cristo**

**4** <sup>1</sup>Koií kjoa-la ngajen, mikii mahindaà inima-najen nga jè Na'èn-ná kjòhimakeè-najen nga xá ts'e kisìngatsja-najen. <sup>2</sup>Jyeé kichjaàxin-jen jñà kjoa ch'o xi tji'ma, xi sísobà-najen; mikii chonachan-jen, ni mikii níkatjìya-lajen 'én-la Nainá. Nguì 'én kixi bènojmi-jen, mejèn-najen nga nguixkon Nainá ngats'iì xita kàteèxkon kjohítsjeèn-najen kós'ín 'nè-jen. <sup>3</sup>Jè 'én

ndaà-la Nainá xi kjoa ts'e Cristo xi nokjoàya-jen, jñà xita xi ya tíchijajiin kjoa ts'e jé-la, ta jñà-né xi tíjtsa'ma kjohítsjeèn-la nga mìkiì fiya-la. <sup>4</sup>Jè xita neí xi tíhotíxoma-la isò'nde nàchrjein i'ndeí, xi kòs'ín tíjna koni tsà nainá, jé bíchjoà xkon jñà xita xi mìkiì mokjeíin-la it'aà ts'e Cristo; nga jè bíjñò kjohítsjeèn-la, mé-ne nga mìkiì skoe-ne kjoahiseèn-la 'én ndaà-la Nainá xi kjoa ts'e Cristo xi 'nó jeya tíjna, nga jè Cristo xi okó kó kji xi nguì jè sobà Nainá. <sup>5</sup>Ngajen, mìtsà tà it'aà tsajen nokjoà-jen k'e nga bènojmiya-jen 'én-la Nainá; it'aà ts'elé Jesucristo nokjoà-jen nga jè xi otíxoma-ná. Ngajen, tà chi'ndaá ma-jen nga ngajen nìxá-nòjen, koií-né nga matsjacha-jen Jesús. <sup>6</sup>Nainá, jè xi kitsò nga jè ni'ín kàtasíhiseèn i'nde nándà jñò choòn, tíjè-né xi kisihiseèn jjiin inima-najen, mé-ne jñà xita xi kj'eíí kòhiseèn-la nga skoexkon kjoa jeya-la Nainá koni s'ín 'ya-la ts'e Cristo.

### Mé-ne tíjngòd-ne takoán nas'ín kjo'in títšaníkjiáán

<sup>7</sup>Kjondaà jè xi 'nó tse chjí-la, yaá tíjiiin yijo-najen. Tanga yijo-najen k'oaá s'ín ngaya-la koni tíjí ni'nde. Jè Nainá k'oaá s'ín kis'iin mé-ne nga 'ya-la nga jè nga'nó xi 'nó ndaà tísíxájiin yijo-najen, it'aà ts'e Nainá nchrobá-ne; mìtsà it'aà tsajen nchrobá-ne. <sup>8</sup>Nó kjin ma-ne kjoa xi tíjn-najen, tanga maá kitjokàjiin-jen. Tjín kjoa xi makájno-najen, tanga mìkiì mahindaà-jen. <sup>9</sup>Fítjinguì kondraá-najen xita, tanga Nainá mìkiì tsjeiin takòn-najen; jñà xita beètoòn-najen, tanga mìkiì chíkjoa-la nga síkjehesòn-najen. <sup>10</sup>Nita nándà-ne nga onguí-jen, kjit'aà nàchrjein mejèn-la sìik'en-najen xita koni s'ín komàt'in Jesús; tanga jè Nainá, jè xi mejèn-la nga it'aà tsajen kàta'ya-la nga jè Jesús xi tísíkjínakon-najen. <sup>11</sup>Ngajen xi títšaníkon-najen, kjit'aà nàchrjein tíjnat'aà chrañà-najen kjoabiyaà xi jè ngatji-la Jesús, mé-ne jè yijo-najen xi ma biyaà jcha-la kjoabinachon ts'e Jesús. <sup>12</sup>Ngajen, kjo'iín títšaníkjeíin-jen skanda mejèn-la xita sìik'en-najen, tanga jñò kjoabinachon tísakó-nò.

<sup>13</sup>K'oaá s'ín tíchja Xojon-la Nainá nga tsò: “Mokjeíin-na k'oaá ma-ne nga kichjà.” Ngajen, k'oaá tís'ín tíjn inima-najen it'aà ts'e 'én xi mokjeíin-najen, k'oaá ma-ne nga nokjoá-jen. <sup>14</sup>Jè Nainá xi kisikjaáya-la Na'èn-ná Jesús it'aà ts'e kjoabiyaà, 'ya-nájen nga tíkooá kijchò nàchrjein nga sìikjaáya-najen

koni s'ín jaáya-la Jesús. Ikjoàn ngats'iaá kjiko-ná ya nguixkon Nainá. <sup>15</sup>Ngats'iù kjoa koi, kjondaà tsajòn-nò, mé-ne isa kjìn koma-ne xita xi tjoé-la kjondaà-la Nainá, nga tikoa isa jeya kijná Nainá nga kjìn ma xita xi tsjá-la kjondaà.

<sup>16</sup>K'oaá ma-ne mikiù mahindaà inima-najen; kixí kjoa yijo-najen tífehengui-né; tanga Nainá, nachrjein nchijòn tísixitseyá inima-najen. <sup>17</sup>Jè kjo'in xi nikjeíin-jen i isò'nde, tà chibaá tjin. Tà jngodè tjò oto. Tanga yaá sakó-najen kjondaà xi isa jeya tjin xi mikiù fehet'aà nita kjé-ne. <sup>18</sup>Nga mitsà jña chitseyèn-lajen kjoa xi tjin isò'nde xi tseyèn, jña chitseyèn-lajen xi mikiù tseyèn xi ts'e Nainá. Kjoa xi tíma i isò'nde, kjoehet'aà-né, tanga jña kjoa xi mikiù tseyèn, mikiù kjoehet'aà nita kjé-ne.

### Ni'ya xi tjindaà-la Nainá ján ngajmiù

**5** <sup>1</sup>Yijo-ná k'oaá s'ín गया-la koni ni'ya xi tjin i it'aà nangui xi chiba nachrjein ma-la nga bixòña. Tsà kixoña ni'ya jè, Nainá tjindaà jngodè-la ni'ya ján ngajmiù, xi tjina nita kjé-ne, nga mitsà tsja xita kisindaà-ne. <sup>2</sup>K'oaá ma-ne nga imaá fahatse-la inima-ná i isò'nde nga jè xi mejèn-ná nga niton kitsajnayaá ni'ya-ná ján ngajmiù. <sup>3</sup>Nas'ín sijna yijo-ná xi tsjach'á i'nde, Nainá tsjá jngodè-ná xi yijo xitse. Jè inima-ná mitsà chija, yijo xitseé koma. <sup>4</sup>K'e nga tákó tijnakon yijo-ná koni jngodè ni'ya xi ma bixòña, imaá fahatse-ná, maba-ná, mikiù tsò takoán nga nikijna ni'ya-ná. Majin-ná nga tjáxin-ná ni'ya jè, jè xi mejèn-ná nga kàtaxitseyá yijo-ná mé-ne nga yijo-ná xi ma biyaá jngodè k'aá jchija nga jè kjoabinachon sikijne-la. <sup>5</sup>Jè Nainá xi xó k'oas'ín tsibindaà-ná kò kitsjaà-ná Inima Tsjeè-la mé-ne tjikixi-ne kjoa nga iskan tsjá yije-ná koni s'ín kitsjaà tso'ba.

<sup>6</sup>Kjit'aá nachrjein k'oas'ín tjngodè takoán it'aà ts'e Nainá kò k'oaá s'ín tjiin-ná, k'e nga tákó tijnakon yijo-ná i it'aà nangui koni jngodè ni'ya ñanda titsajnaá, kjiin titsajna-lá ni'ya-la Na'èn-ná ján ngajmiù. <sup>7</sup>K'oaá s'ín titsanjchá yijo-ná koni s'ín mokjeíin-ná it'aà ts'e Nainá, mi k'oaá s'ín mochjeén nga kos'ín sijchá yijo-ná koni s'ín beè xkoaán. <sup>8</sup>Tjngodè takoán it'aà ts'e Nainá, isaá-la ndaà tjin tsà sikijnaá yijo-ná, mé-ne nga ján kitsajnakoá Na'èn-ná ngajmiù. <sup>9</sup>Koi kjoa-la nga ndaà sikitasoán koni s'ín sasén-la Na'èn-ná, a i titsajnaá it'aà nangui



a xi ján titsajnaá ján ngajmiì. <sup>10</sup>Mochjeén-né nga ngats'iaá kijchoaá nguixkõn ñanda tíhotíxoma Cristo nga k'oì-lá kinda nga jngod jngoaa; tjoé-ná chjí-ná mé kjoa xi ki'né nga titsajnaá isò'nde, a ndaa ki'né, o xi ch'o ki'né.

### **Èn xi tsjá kjoa'nchán it'aà ts'e Nainá**

<sup>11</sup>Nga yaxkón-jen Nainá koni s'ín ok'in-la, k'oaá ma-ne bènojímí-lajen xita xi kj'eíí, mé-ne kòkjeiín-la it'aà ts'e Cristo. Nga nguixkõn Nainá ndaa beèxkon-najen nga ndaa 'nè-jen, 'an k'oaá tis'ín mejèn-na nga tikoá jñò jyeé ndaa yaxkon-nájèn.

<sup>12</sup>Mìtsà 'mì-nòjen nga tijn ndaa nikítsajna-nájèn yijo-najen tanga jè xi mejèn-najen nga tsja kátama-nò it'aà tsajen, mé-ne koma kinókjoa-là jñà xita xi tijnà ndaa síkítsajna-ne yijo-la koni s'ín tsejèn-la, tanga jè inima-la mìkiì ndaa síkinda.

<sup>13</sup>Tsà ská-najen, koi-né nga Nainá nixá-lajen, tsà ndaa tjín kjohítsjeèn-najen, kjondaà tsajòn-nò nga jñò nixá-nòjen. <sup>14</sup>Jè kjoatjòcha-la Cristo jè kitsobà'ñó-najen nga ma fiko-najen koni s'ín mejèn-la, k'oaá tjín kjohítsjeèn xi kjòchiya-najen nga jngod xita k'en ngajo-la ngats'ii xita xi tjín isò'nde, k'oaá komà-ne nga ngats'ii xita k'en. <sup>15</sup>Jè Cristo k'en ngajo-la ngats'ii xita xi tjín isò'nde, mé-ne jñà xita xi títsajnakon mì tì k'oaá s'ín sijnchá-ne yijo-la koni s'ín mejèn-la yijo-la. K'oaá s'ín sijnchá yijo-la koni s'ín mejèn-la Cristo nga jè k'en ngajo-la koa jaáya-la it'aà ts'e kjoabiyaá.

<sup>16</sup>I'ndeì mì tì kiì k'oas'ín nikítsjeèn-najen it'aà ts'e xita xi kj'eíí kós'ín tsejèn, kó kjoàn, koni s'ín s'ín jñà xita isò'nde. K'e nga sà ítjòn k'oaá s'ín kinikítsjeèn-jen, jè Cristo, tsà taxki xita isò'nde-nè. Tanga i'ndeì mì tì k'oaá s'ín nikítsjeèn-najen. <sup>17</sup>Jngod xita, k'e nga Cristo tijnako, xita xitse-né it'aà ts'e Nainá. Jè kjoa jchínga jyeé tsato, jyeé kjòxitseya yije.

<sup>18</sup>Ngats'ii kjoa koi it'aà ts'e Nainá nchrobá-ne, nga it'aà ts'e Cristo kichibàndaà-ná kò Nainá. Kò jè Nainá kitsjaà-najen xá nga koma kénajímí-jen kós'ín kjoóndaà-ne xita kò Nainá. <sup>19</sup>It'aà ts'e Cristo kisixá Nainá nga kisikjoóndaà-ne xita isò'nde. Mì tì kiì kinda kis'iin-ne jé-la jñà xita. Kò kitsjaà-najen xá nga bènojímí-jen kós'ín ma nga chibàndaà-ná kò Nainá. <sup>20</sup>K'oaá ma-ne ngajen síkasén-najen Cristo nga nokjoà ngajo-lajen. K'oaá ngaya-la koni tsà jè Nainá tíbítsi'ba-nò. It'aà ts'e Cristo bìtsi'bà-nòjen: jchibàndaàkò-nò Nainá. <sup>21</sup>Cristo, mìtsà jé

tsohótsji; tanga xi kjondaà tsaján, Nainá, jé tsohónè yije-la ngats'iì jé xi tjín isò'nde, mé-ne it'aà ts'e Cristo, xita kixi komaá nga jè Nainá sùkixiya-ná.

**6** <sup>1</sup>Ngajen, xi Nainá nìxát'aà-lajen, bítsi'ba-nòjen, kjondaà xi tsjá-nò Nainá, ndaà tikjeén. <sup>2</sup>Nga jè Nainá, k'oaá tsò: Ki'nchrè-lè k'e nga ndaà chiba-la kjòchjeén-lè kjondaà-na, tsohósikoó-lè, jè nachrjein k'e nga tíchiñá-la nga kitjojìn kjo'in.

I'ndeì, jñò, ndaà tiná'yaà. Jyeé ijchò nachrjein ts'e kjondaà-la Nainá nga kítjokàjñòd kjo'in.

<sup>3</sup>Nimé kjoa xi ch'o 'nè-jen xi síkits'ón-jìn-la xita xi kje'íí, mé-ne jè xá-la Nainá xi jìn titsa'nè-jen mì yá xi ch'o kichajno-la. <sup>4</sup>Nita mé kjoa xi 'nè-jen, ndaá onguíko-jen yijo-najen mé-ne jñà xita skoe-ne nga chi'nda-la Nainá 'mì-najen, nga 'ñó tjín-najen kjoatsetakòn, 'ñó ndaà chíkjoako-najen kjoa ts'e kjo'in, ko tíchijat'aà-najen mé tsojmi xi kochjeén-najen, koa chjá tíma-najen kjoa xi tíhotojìn-jen, <sup>5</sup>nga tísat'é-najen, nga ndayá tìnìkjas'en-najen, nga ngajen binchaàtsji-lajen kjoasì naxandá, nga 'ñó nìxá-jen, ko mìkii tsafé-jen, skanda bitsajna kjinchrá-najen. <sup>6</sup>Tanga nguì tsjeé titsañjchá-jen yijo-najen; ndaá machiya-najen nita mé kjoa-ne; tjín-najen kjoatsetakòn ko kjondaà it'aà ts'e xita; ko jè Inima Tsjeè-la Nainá tísíxájin inima-najen; ko nguì koó inima-najen nga tjín-najen kjoatjòcha. <sup>7</sup>Bènojmi-jen 'én xi kixi tjín. Tjín-najen nga'ñó-la Nainá. Jñà kjoa kixi xi 'nè-jen, k'oaá ngaya-la koni jñà kicha xi ko ngaskón ko kixi mochjeén. <sup>8</sup>Tjín xita xi beèxkón-najen, tikoá tjín xi mìkii beèxkón-najen. Sakoáá ndaà chja it'aà tsajen, sakoáá majìn. Tjín i'nga xi xita ndiso tsò-najen tanga ngajen 'én kixíí nokjoá-jen. <sup>9</sup>Tjín i'nga xi k'oas'ín síko-najen koni tsà mìkii beèxkon-najen, tanga tjín xi beèxkon-najen. K'oaá s'ín beèhikon-najen koni tsà jyeé k'en-jen, tanga titsajnakon-najen. Tsjá-najen kjo'in jñà xita tanga mìkii biyaà-jen. <sup>10</sup>K'oaá s'ín ko'an-najen koni tsà ba tjín-najen, tanga ngajen tsja tjín-najen. Tsò-najen nga xita ima-né, tanga it'aà tsajen, kjin jchán xita tísakó-la kjondaà ts'e inima-la. Nimé xi tjín-najen, tanga nguixkon Nainá, tjín yijeé-najen nita mé-ne.

<sup>11</sup>Jñò 'ndseé xi Corinto tsajòn, jyeé kinokjoà kixi-nòjen; nguì koó inima-najen matsjacha-nòjen. <sup>12</sup>Ngajen, mìtsà

bìxkon-nòjen kó tsò kjohítsjeèn-là inìma-najen, jñò-nó xi bìxkoòn kó tsò kjohítsjeèn-là inìma-nò. <sup>13</sup>K'oaá s'ín chjà-nò koni tsà ìxti-na xan-nò, jñò, k'oaá tìs'ín t'een koni s'ín 'nè-jen, nga kò inìma-nò tìtsjacha-nájen.

### Tìnchat'aàxìn-là kjoa ts'e jé

<sup>14</sup>Jñò, xi mokjeiín-nò it'aà ts'e Cristo, kì jñà xìta xi mìkiì mokjeiín-là nìngàsòn-kò kjohítsjeèn-nò. ¿A komaá kongàsòn-kò jngodò xìta xi tìjín-là okìxi kò jngodò xi tsjìn-là okìxi-là Nainá? ¿A komaá ya kìtsajnajñaá ñánda jñò choòn nga tìjín kjoa iseèn? <sup>15</sup>¿A komaá ndaà kjìkò xíkjín, jè Cristo kò xìta neí? Tìkooá mìkiì koma ndaà kjìkò xíkjín jngodò xìta xi mokjeiín-là it'aà ts'e Cristo kò jngodò xi mìkiì mokjeiín-là. <sup>16</sup>Mìkiì koma ya sijnaya ni'ya ìngo-là Nainá jñà xkòsòn xi nainá tsò-là xìta. Nga jñá-ná xi 'mì-ná ni'ya ìngo-là Nainá xi tìjnakon. Koni s'ín kitsò Nainá it'aà ts'e xìta xi mokjeiín-là, tsò-né:

'An, yaá kótijnakoaa naxandá-na, tìkooá yaá kojmejiìn-là.

'An-ná xi Nainá kìtso-na koa jñà koma xìta naxandá-na.

<sup>17</sup>Nainá k'oaá kitsò nga kìichjajiìn-là xìta naxandá-là:  
Tìtjokàjiìn-là jñà xìta xi mìkiì mokjeiín-là it'aà ts'an,  
koa tìnchat'aàxìn-là.

Nìmé kjoa chingàjñòò xi tjé tìjín nga nguixkoaàn,  
mé-ne nga 'an koma skoétjò-nò.

<sup>18</sup>'An-ná xi skoétjò-nò koni jngodò Na'èn,  
jñò koma ndí ìxti x'ìn-na kò ndí ìxti íchjín-na,  
k'oaá tsò Na'èn-ná xi ta jè tajngodò xi 'ñó tse nga'ñó tìjín-là.

**7** <sup>1</sup>Jñò ndí 'ndsè xi matsjake-nò, k'oaá tìjín kjondaà xi tsjá-ná Nainá koni s'ín kitsjaà tso'ba. K'oaá ma-ne kìnchat'aàxìn-là ngats'iì kjoa xi tjé tìjín xi síkìts'ón yijo-ná kò inìma-ná, mé-ne tsjeè kìtsajnaá nga nguixkon Nainá. Ndaà jchaxkoán Nainá mé-ne nga kjit'aà nachrjein ìsa tsjeè sijchá yijo-ná.

### Mé-ne tsja ma-là Pablo kjoa xi s'ín xìta Corinto

<sup>2</sup>Chjoétjò-nájen nga kò inìma-nò. Ngajen, niyá xìta xi ch'o nìkò-jen; nì saá yá xìta nìkí'on-jen, nì saá jngodò xìta chonachan-lajen. <sup>3</sup>K'e nga k'oaas'ín tìxan-nò, mìtsà mé kjoa xi ch'o tìjín tìhonè-nò; jyeé k'oa kixan-nò nga sa ìtjòn, kjit'aá nachrjein nga matsjacha-nòjen, nas'ín kiyá kò tsà

titsajnakoaán, koo inima-najen nga matsjacha-nòjen. <sup>4</sup>Ngui 'én kixí xi tichjàko-nò; 'ño matsja-la inima-na it'aà tsajòn. 'Ñó tjin-na kjojetakòn ko taxki tsjaá ma-la inima-na, nas'in tse kjo'in tjin-najen.

<sup>5</sup>K'e nga j'i-jen i nangui Macedonia, nimé xi komá kinikjáya-jen. 'Nó kinikájno-jen; xki xi ján kis'e-najen kjoasiì, koa ya ijin inima-najen 'ño kisinchaàxkón. <sup>6</sup>Tanga Nainá síjehikon-né xita xi indaà tjin ikon; kisijehikòn-najen k'e nga j'i Tito. <sup>7</sup>Mitsà tà koi kjoa-la nga j'i Tito, jè-né nga jè, tikoaá tsja tjin-la xi it'aà tsajòn. Tsibénojmi-najen nga jñò, 'ño mejèn-nò nga jchaxkon-nájen. K'oaá ti kitsò-najen nga ba titsajnaà koa makájno-nò it'aà ts'an. K'e nga ki'nchrè 'én koi, 'an, isaá ndaà kjòtsja-na.

<sup>8</sup>Jñò, nas'in tà kjoaba tsohotsjì-nò k'e nga kisikasén ítjòn-nò xojon, i'ndei, mì ti kiì tìsikájno-na. Nga sa ítjòn kisikájnoa nga kisikasén jngò-nò xojon, koi kjoa-la nga kisibaá chiba nachrjein-nò. <sup>9</sup>Tanga i'ndei, matsja-la inima-na, mìtsà koi nga kjoaba kis'e-nò kjoa ts'e xojon, koi-né nga it'aà ts'e Nainá kinikájno jé-nò nga mì ti jé chinchàatsji-nò. Jñò, k'oaá s'in kjòba-nò koni s'in mejèn-la Nainá. K'oaá ma-ne nga nimé kjoa ch'o kisakò-nò it'aà tsajen. <sup>10</sup>Jè kjoaba xi s'e-ná koni s'in mejèn-la Nainá, jè síxájiin inima-ná nga níkájnoaá jé-ná nga mì ti jé binchaatsji-ná mé-ne nga koma kitjokàjñaá kjo'in; ko mìtsà mé xi iskan síkájnoaá. Tanga jè kjoaba xi tsjá-ná isò'nde nga mìkiì mokjeiín-ná it'aà ts'e Nainá, jé síxájiin inima-ná nga kjoa biyaá fiko-ná. <sup>11</sup>Tanga tikítsjeèn ngats'iì kjondaà xi ki'nè ta koi kjoa-la nga kjoaba kisakò-nò it'aà ts'e Nainá. I'ndei titsajnandaà-nò nga s'een kjoa xi tjinè-nò nga sikitasòn; k'oaá s'in titsahokoò yijo-nò nga nimé jé tjin-nò; majticha-nò kjoa ts'e jé; i'ndei tsakjoòn-chaà Nainá; mejèn-nò nga jchaxkon-ná; makájnoó-nò it'aà ts'an; k'oaá komà-ne nga kits'i-là kjo'in jè xita xi tsohòtsji jé. Ngats'iì kjoa koi koni s'in ki'nè, k'oaá s'in 'ya-la nga mìtsà ngats'ioò tjin-nò jé. <sup>12</sup>An, koni s'in kiskii-nò xojon carta xi kisikasén-nò, mìtsà jè tìsikítsjeèn it'aà ts'e xita xi tsohòtsji jé; ni mìtsà it'aà ts'e xita xi kits'ìon kisikasén-nò xojon. Jè-né nga tijñò ki'ya-nò nga nguixkon Nainá nga kixí kjoa nga tjòcha 'ya-nájen. <sup>13</sup>Maje takòn-nájen ngats'iì kjoa xi ki'nè.

Mìtsà ta koií kjoa-là nga maje takòn-jèn it'aà ts'e kjoa koi; ìsà 'nó matsja-najèn nga ki'ya-jèn Tito nga 'nó tsja tjin-là, koií kjoa-là nga ngats'ioò kinitjsakoo. <sup>14</sup> 'An, jyeé kòs'ín ndaa kisikítsajna-nò nga nguixkon Tito koni kixan-là. Jñò, nímé kjoa tjin xi ch'o kinikjina-ná. Koni s'ín nga ngats'iì 'én xi ki'mì-nòjèn, nguì 'én kixi-né, k'oaá tìs'ín kixi itjo koni tsò 'én xi kixan-là Tito nga ndaa kisikítsajna-nò. <sup>15</sup> Tito, ìsáá 'nó ndaa matsjakeè-nò k'e nga bítsjeèn-là nga ngats'ioò ndaa kinikitasòn-là kò ndaa kichjoétjò k'e nga ijchòkon-nò, koa 'nó ndaa kiyaxkón. <sup>16</sup> I'ndeì, it'aà tsajòn ma'nót'aà takoàn nita mé kjoa-ne, k'oaá ma-ne nga matsja-là inima-na.

### Mé kjoa-ne nga ton maxkó-ne

**8** <sup>1</sup> Ndí 'ndsè kò tichjaá, mejèn-na nga kàtasijjìn-nò kjondaà-là Nainá xi okó ijìn naxandá-là Cristo xi títsajna ya nangui Macedonia. <sup>2</sup> Nas'ín 'nó tse kjo'in nchihotojìn tikoá tí'ya-là nga 'nó matsja-là. Nas'ín 'nó xita ima, jñà tsojmì xi tsjá kjotjò-là Nainá, koo inima-là tsjá koni tsà 'nó xita nchiná. <sup>3</sup> 'An, tíbe-ná nga koo kjotsja-là tsjá ton xi kjotjò ts'e Nainá koni kji bijchó nga'nó-là, saà k'oaá skanda tsjásòn-né koni kji bijchó nga'nó-là. <sup>4</sup> Jñà xita koi, 'nó tsibítsi'ba-najèn nga mejèn-là nga tikoá sikkasén-là ton kjotjò jñà xita naxandá-là Cristo jè i'nde nãnda kochjeén-là. <sup>5</sup> Jñà xita koi, ìsáá tsato kitsjaà koni s'ín titsachiñá-lajèn. Ítjòn nangui kisikítsajna-là Nainá inima-là, ikjoàn, k'oaá ti s'ín kis'iìn it'aà tsajèn koni s'ín mejèn-là Nainá. <sup>6</sup> K'oaá ma-ne bítsi'ba-lajèn Tito koni s'ín tsibítsi'iaqò xá xi kitjoé-là k'e nga sa ítjòn, k'oaá tìs'ín kàtasíkjuhèt'aà-ne nga kàtíxkó ton kjotjò xi jñò 'biòð. <sup>7</sup> Tanga jñò, 'nó ndaa 'nè-nò ngats'iì kjoa xi 'nè nga ndaa mokjeiín-nò, nga ndaa nokjoà, nga ndaa tjin-nò kjoa chjine, nga titsajnandaà nga mejèn-nò sichját'aà nita mé kjoa-ne, nga tjin-nò kjoatjòcha nga it'aà tsajèn komà-nò. Koni s'ín 'nè yije kjoa koi, k'oaá tìs'ín tikatonè-là jè kjotjò xi 'biòð.

<sup>8</sup> Mìtsà k'oa's'ín tixan-nò koni tsà jngoò kjotíxoma títsja-nò. Jè xi mejèn-na nga skoeè a nguì kixií kjoa nga tjin-nò kjoatjòcha koni s'ín tjin-là xita xi kj'eíí nga titsajnandaà nga tsjá kjotjò-là. <sup>9</sup> Jñò, jyeé 'yaà kjondaà-là Jesucristo xi otíxoma-ná. Xita imaá kis'iìn yijo-là xi kjondaà tsajòn, nas'ín ts'e yije-né ngats'iì tsojmì xi tjin, mé-ne jñò tjoé-nò kjoa nchiná xi tjin-là.

<sup>10</sup>Tsjaā jngod̄-nò kjohítsjeèn it'aà ts'e kjoā jè. Kochjeén-nò nga ndaà s̄ikitasòn koni s'ín tsibìts'iākoō jè nó xi tsato nga kits'iōd̄ tòn xi kjotjòd̄ ts'e Nainá. K'oas'ín ki'nè nga kò kjotsja-nò kits'iōd̄. <sup>11</sup>I'ndēi, tákó k'oāá s'ín t'een koni s'ín tsibìts'iākoō. K'oāá s'ín tikjehet'aà koni s'ín kjòmejen̄-nò nga sā ítjòn. K'oāá kji tjiōd̄ koni kji bijchó nga'nó-nò. <sup>12</sup>K'e nga jngod̄ x̄itā xi tíjnandaà nga kò inima-là mejèn-là tsjá, k'oāá kji kàtatsjá koni kji ma xi s'ín, mìtsà tsato t̄inijé-là. Nainá mìtsà tsato s̄íjé koni kji ma xi 'nè.

<sup>13</sup>Mìtsà koi kjoa-là nga kjo'in s'e-nò nga s̄ichját'aà-lá x̄itā xi kje'íi, jè-né nga ngàsòn ngáya s'e-ná mé xi mochjeén-ná. <sup>14</sup>I'ndēi, j̄nà x̄itā koi, tsjìn-là mé xi mochjeén-là, tanga j̄nò, t̄jín-nò. K'e nga kje'íi nachrjein, j̄nà x̄itā koi, s'eé-là mé xi mochjeén-là, kò j̄nà kos̄ikò-nò k'e nga j̄nò tsjìn-nò. K'oāá s'ín ngàsòn ngáya s'e-ná mé xi kochjeén-ná. <sup>15</sup>K'oāá s'ín tíchja Xojon-là Nainá nga tsò: “Jè xi k̄jìn tsibíxkó, n̄imé tsiningui-là, koā jè xi chiba tsibíxkó, n̄imé kis̄ichjaat'aà-là.”

### Kós'ín komà nga kinikasén Tito ján Corinto

<sup>16</sup>Ndaà ch̄jí-là Nainá nga k'oas'ín tsibíj̄iìn inima-là jè Tito nga t̄ikoā kis̄ikájno it'aà tsajòn koni s'ín 'an kis̄ikájnoa. <sup>17</sup>Kixíi kjoā jè Tito kòkjeiín-là koni s'ín tsibit'ín-là; t̄ikoā jè, 'nó mejèn-là nga kiìkon-nò; ikoón xi kitsò nga k̄jikon-nò.

<sup>18</sup>Jè Tito tífiko jngod̄ 'ndseé xi ndaà sík̄jna ngats'ìi x̄itā naxandá-là Cristo xi t̄jín n̄itā n̄anda-ne; nga jè 'ndseé ndaà chjaya 'én ndaà-là Nainá xi kjoā ts'e Cristo. <sup>19</sup>Mìtsà tà koi kjoā koi, t̄ikoāá j̄nà naxandá-là Cristo jāj̄iìn jè 'ndseé nga koahijtako-najen nga onguíko-jen tòn kjotjòd̄-là Nainá xi ngajen t̄itsabíxkó-jen mé-ne jè Na'èn-ná jeya k̄jna, t̄ikoā skoē j̄nà x̄itā nga koó inima-najen síchját'aà-lajen x̄itā. <sup>20</sup>K'oāá ma-ne nga mì yá x̄itā k̄ichjajno-najen kós'ín kochjeén tòn xi tse tímaxkó. <sup>21</sup>K'oāá s'ín b̄nè-lajen yijo-najen kjoā xi ndaà t̄jín nga nguixkòn Nainá kò t̄ikoā nguixkòn x̄itā.

<sup>22</sup>Tito, t̄ikoāá báhijtako òjngod̄ 'ndsé xi x̄k̄i xi ján ki'ya-jen nga 'nó b̄nè-là yijo-là nga k̄jìn xá ma-là. T̄jín kixi-né i'ndēi, ìsáá ndaà b̄nè-là yijo-là nga síchját'aà-nò nga ìsà ndaà beè takòn-nò. <sup>23</sup>Jè Tito, amigo ts'an-ná nga 'aán síxáko-na xi k̄jondaà tsajòn. J̄nà x̄itā 'ndseé xi i'nga, j̄nà naxandá-là Cristo xi t̄jín nangui Macedonia j̄nà kis̄ikasén; nga it'aà ts'e x̄itā

'ndseé koi, jè Cristo jeya bijna. <sup>24</sup>Takó-là xitá koi kjoatjòcha xi tjin-nò, takó-là kjondaà xi tjin-nò koni s'ín jye okixan-là jñà xitá 'ndseé koi, mé-ne nga skoe-ne jñà naxandá-là Cristo xi i'nga nga kixi kjoa.

**Mochjeén-né nga sichját'aà-lá xitá-lá Cristo xi kje'ejí**

**9** <sup>1</sup>Jè kjoa ts'e nga'ño xi maxkót'aà-lá jñà xitá tsjeè-lá Nainá xi kochjeén-lá jè nga'ño, mì tì kii mochjeén-ne nga 'an skiì-isa-nò. <sup>2</sup>Be-ná nga titsajnaandaà nga mejèn-nò sikitason. K'oaá xan-lá jñà xitá xi nangui Macedonia ts'e nga jñò xi Acaya tsajòn, titsajnaandaà-nò skanda jè nó xi tsato nga mejèn-nò sikasén nga'ño. K'e nga kii'nchré jñà xitá Macedonia koni s'ín tita'nè, kjin ma-ne xi matsja-lá it'aà tsajòn tikoáá kjòtsja-lá nga mejèn-lá sichját'aà. <sup>3</sup>Koií xá tìsikasén-nò jñà 'ndseé koi, mé-ne 'an mì ch'o kótijna-na tsà koi nachrjein-lá tsà ta 'én ndiso koma-ne koni s'ín ndaà síkítsajna-nò it'aà ts'e kjoa koi, mé-ne jñò titsajnaandaà koni s'ín kixan. <sup>4</sup>Kós'ín koma-ne tsà koi nachrjein-lá kjiiko i'nga-na xitá Macedonia. K'e nga kijchò skoe-nò nga kj'eè kii titsajnaandaà nga'ño xi sikasén. Tsà k'oas'ín koma kjoa koi, ngajen kosobá-najen, kò jñò, isaá 'ño kosobà-anò. Nga ngajen, it'aà tsajòn 'ño ndaà níkítsajna-nòjen. <sup>5</sup>Koií kjoa-lá k'oaá s'ín tìsíkìtsjeèn nga tsibitsi'ba-lá jñà 'ndseé nga kìsikasén ítjoàn, mé-ne nga kàtikon-nò koa kàtasichját'aà-nò nga kàtìxkòko-nò ton kjotjò xi jye k'oas'ín kits'iod ndsobaà, mé-ne k'e nga jye tijnandaà kjotjò-nò jcha-lá nga ijìin inima-nò inchrobàjìin-ne; mìtsà kjo'ño komà-nò.

<sup>6</sup>Tíkìtsjeèn jè 'én xi tsò: Jè xi chiba tsojmì bítje, chibaá tsojmì majchá-lá; jè xi tse tsojmì bítje, kjin tsojmì majchá-lá. <sup>7</sup>Nga jngoð ijngoð, k'oaá kji kàtatsjá koni kji kosòn-lá inima-lá. Mìtsà kò kjoba-lá nga tsjá, nì mìtsà kjo'ño koma-lá, nga Nainá tsjakeè-né xi kò kjòtsja-lá tsjá. <sup>8</sup>Nainá koma-lá tsjá yije-nò kjondaà xi tjin-lá, mé-ne nga kjit'aà nachrjein s'e yije-nò xi mochjeén-nò, skanda kininguú-nò mé-ne koma sichját'aà ts'e xá xi ndaà tjin. <sup>9</sup>K'oaá s'ín tíchja Xojon-lá Nainá nga tsò:

Kisika'bí-lá xitá ima nga kitsjaà-lá mé xi mochjeén-lá.

Kjoakixi-lá, mìkii kjoehet'aà nita kjé-ne.

<sup>10</sup>Nainá tsjá tje-lá tsojmì xi sitje, tikoá tsjá tsojmì xi chineé. Tsjá yije-nò xi mochjeén-nò nga kitjee; tikoáá síjchá tsojmì xi

bitjee. Kjin skoya kjondaà sakò-nò k'e nga kò kjoakixi-nò 'biòd kjotjò-nò. <sup>11</sup>Jñò, s'e yije-nò ngats'iì kjoa nchinà xi tjín, mé-ne nga kò kjondaà-nò ma sichját'aà-là xita xi k'ejí, nga sikasén-là kjotjò xi ngajen onguíko-jen. K'e nga tjoé-la jñà xita 'ndseé, tsjá-la kjondaà Nainá. <sup>12</sup>Jñà tsojmì kjotjò xi titsanikasén-là jñà xita 'ndseé, mìtsà ta koi kjoa-la nga kochját'aà-la mé xi chija-la, tikoá koií-né nga isa kjin koma xita xi tsjá-la kjondaà Nainá. <sup>13</sup>Jñà xita koi, k'e nga tjoé-la tsojmì kjotjò, jeya siikíjna Nainá. K'oaá s'ín skoe-ne nga kixí kjoa nga jñò nikitason-nò 'én ndaà-la Nainá xi kjoa ts'e Cristo koni s'ín mokjeiín-nò. Jñà xita koi skoexkón Nainá it'aà ts'e tsojmì kjotjò xi 'biì-là kò xi 'biì-la jñà xita xi k'ejí. <sup>14</sup>Koó inima-la kichjat'aà-la Nainá it'aà tsajòn, nga 'nó tse kjondaà tísakó-nò xi tsjá-nò Nainá. <sup>15</sup>¡Ndaà chjí-la Nainá nga 'nó tse kjondaà tsjá-ná, skanda tsjin-ná 'én kós'ín k'oi-lá kjondaà!

**Kó tò Pablo nga chjatji xá-la nga chi'nda-la ma Cristo**

**10** <sup>1</sup>¡An xi Pablo 'mì-na, bitsi'bà-nò it'aà ts'e Cristo xi tjín-la kjondaà, kò xi indaà tjna inima-la. Tjín xita xi tsò-na nga ima kjoa xó s'iaàn k'e nga ya tijnajin-nò, kò 'nó xó ts'en s'iaàn k'e nga kjiin tijnáa. <sup>2</sup>Tikoá bitsi'bà-nò k'e nga kíkón-nò, jñò, ítjòn jchibàya-nò kjoa xi tjín-nò, mé-ne k'e nga kijchoa, kì kiì binè-nájen nga 'nó kichjàkooa jñà xita xi k'oas'ín nchitsò nga k'oaá s'ín titsa'nè-jen koni s'ín xi taxkì xita isò'nde. Tanga 'an, tjna ndaà-ná nga kojtikooa jñà xita xi chjajno-najen. <sup>3</sup>Kixí kjoa nga xita isò'nde 'mì-najen, tanga mì k'oas'ín bixkán-jen koni s'ín kjaán jñà xi taxkì xita isò'nde. <sup>4</sup>Kicha xi nikjeén-jen, mìtsà kicha ts'e isò'nde. Nga'nó ts'e Nainá-né xi ma-la síkixòña nga'nó-la xita neí xi bíchjoà ikòn-la 'én-la Nainá. <sup>5</sup>Níkixòña-nájen ngats'iì kjohítsjeèn xi ch'o tjín kò kjoa 'nga takòn xi kondra ts'e kjoachjine-la Nainá. Ndobà'nó-nájen ngats'iì kjohítsjeèn mé-ne koma kitason-la Cristo koni s'ín mejèn-la. <sup>6</sup>Titsajnandaà-nájen nga k'oi-lajen kjo'in xita nita mé kjoa-ne xi mìkiì ndaà bitason-la, k'e nga jye jcha-la nga jñò kixí nikitason.

<sup>7</sup>Jñò, tà k'oaá s'ín chítsejèn-là koni s'ín 'ya-la jñà xita. Tsà tjín i'nga xita xi tsò-la yijo-la nga jè Cristo kisikasén, ndaà kàtasíkítsjeèn, tikoá ngajen jè sobà Cristo kisikasén-najen. <sup>8</sup>Mikiì masobà-na nga ndaà síkíjna yijo-na it'aà ts'e kjotíxoma



xi kisingatsja-najen Cristo mé-ne koma sichját'aà-nò nga ìsa 'nó kitsajnaà; ko mìtsà koi-ne nga 'an sikits'ón-jiin-nò. <sup>9</sup>Majìn-na nga k'oas'ín sikítsjeèn nga 'an mejèn-na binchaxkón-nò k'e nga xojon tìsikasén-nò. <sup>10</sup>Tjín i'nga xita xi tsò: "Xojon-la, 'nó jchán tjín, 'nó tìchja, tanga k'e nga i tijnajiin-ná mìtsà 'nó xkón kji. 'Én xi chja, mì yá xi ndaà beèxkón." <sup>11</sup>Jñà xita xi k'oà tsò, ndaà kàtasíkítsjeèn koni tsò xojon xi nìkasén-jen k'e nga kjiin tìtsajna-jen. K'oaá tìs'ín s'en-jen k'e nga ya tìtsajnajiiin-nòjen.

<sup>12</sup>Kixíí kjoa, ngajen, majìn-najen nga siingásòn-kjoòko-jen jñà xita xi tì yijo-la ndaà síkítsajna-ne. Jñà xita xi k'oas'ín s'ín, xita tònò-né. Tsjin-la kjohítsjeèn nga tì chiba ts'eé síchiba-ne yijo-la. Tìkoa tì xíkjin síchibakjoò-ne. <sup>13</sup>Ngajen, mìkii síkatonè-lajen chiba-la nga ndaà síkítsajna-jen yijo-najen. K'oaá kji koni kji tsjá chiba Nainá it'aà ts'e xá-najen. Jè Nainá kitsjaà-najen xá xi ijchòko-nòjen skanda ján Corinto. <sup>14</sup>Ko tsà mì-là ngajen ijchò ítjòn-jen, kixíí kjoa kinìkatonè-lajen chiba-la i'nde koni kji kitjò'nde-najen. Tanga ngajen-nájen xi ijchòko ítjòn-nòjen 'én ndaà-la Nainá xi kjoa ts'e Cristo. <sup>15</sup>Mìtsà jin ndaà nìkítsajna-jen yijo-najen it'aà ts'e xá xi nchis'ín xita xi k'jeíí. Mìtsà tìtsanìkatonè-lajen chiba-la koni kji xá xi oko-najen. Chiñàkjoa-nájen, koni s'ín ìsa 'nó ndaà kòkjeíín-nò, ko ìsaá kòtseya xá xi tìtsa'nè-jen. Tanga ta k'oaá kji sixá-jen koni s'ín tjen chiba-la. <sup>16</sup>K'oaá s'ín kénòjmíya-jen 'én ndaà-la Nainá jñà naxandá xi fì-ìsa ñánda kijna naxandá tsajòn. Tanga mì ya kitjás'en-jiin-jen i'nde ñánda jye nchisíxá xita xi k'jeíí nga mì jin ndaà síkítsajna-jen yijo-najen xá xi nchis'ín xita xi k'jeíí.

<sup>17</sup>Jè xi jeya síkijna yijo-la, ta saá Nainá jeya kàtasíkijna.

<sup>18</sup>Mìtsà jè xi ndaà bitjongui xi tì yijo-la ndaà síkijna-ne it'aà ts'e mé kjoa xi s'ín. Jè Nainá xi k'oà kitso tsà kixi kjoa nga ndaà xita.

**Pablo, jè xi nguì xita-la Cristo nga jè tsibíxáya-la**

**11** <sup>1</sup>T'een kjondaà, tìná'ya jngoò tjò-ná; k'oaá s'ín tìchjàko-nò koni jngoò xita xi mì ndaà tìjna kjohítsjeèn-la. Kàtas'e-nò kjoatsejta. <sup>2</sup>Koni s'ín makájno-la Nainá, 'an, k'oaá tìs'ín makájno-na it'aà tsajòn nga mì k'jeíí xita konguít'aà-là. Ta jngoó x'in tsibindaàjiin-ko-nò nga

siingatsja-nò, jè Cristo. <sup>1</sup>ʼAn mejèn-na nga tsjeè siingatsja-nò Cristo koni jngod tsòti xongó. <sup>2</sup>Tanga tsakjoòn-ná tsà k'oas'ín komat'ioòn koni komàt'in Eva nga kiskoòdnachan-là jè ye, tsà ya kits'ón-jiin kjohítsjeèn-nò nga kinchat'aàxìn-lá jè kjoatjòcha kixi xi tjín-nò kò Cristo nga mì tì tjngod-ne takòn nga onguít'aà-là. <sup>3</sup>Nga biì'nde-là nga kj'eíí xita bijchókon-nò xi kj'eíí tsò 'én xi okóya-nò it'aà ts'e Jesús koni tsò 'én kixi xi jin bənojmí-nòjen, kò mokjeiín-nò nga chjoéttjò jngod inima xi kj'eíí xi mìtsà jè Inima Tsjeè-là Nainá xi jye kichjoéttjò. Tikoa, mokjeiín-nò nga kj'eíí tsò 'én ndaà-là Nainá xi kjoa ts'e Cristo xi bənojmí-nò koni tsò xi kòkjeiín-nò nga sà ítjòn. Nga ndaà sasén-nò nga jñà na'yà-là xita koi. <sup>4</sup>ʼAn, mìtsà isa nangui tijna-là jñà xita xi 'mì-là jñò nga isaá 'nga títsajna-là jñà xita xi tsibíxáya-là Cristo. <sup>5</sup>ʼAn, nas'ín mìkii ndaà ma-na chjà, nímé kjohítsjeèn chijat'aà-na xi it'aà ts'e 'én-là Nainá. Jñò, jyeé ndaà 'yaà, 'an, nita ñánda nga tijnaa, k'oaá s'ín tsakoò-nò.

<sup>6</sup>¿A ch'oó kis'iaàn nga tsakoòya-nò 'én ndaà-là Nainá nga nímé kisikíchjí-nò? Nangui tshóttijnako-nò skanda kisihima-ná yijo-na mé-ne jñò isa 'nga kisikítsajna-nò. <sup>7</sup>Jñà xita naxandá-là Cristo xi xìn i'nde-là kisichját'aà-na nga tsachrjekajno-là ton mé-ne komà kisixáko-nò nga tsibenojmí-nò 'én ndaà-là Nainá xi kjoa ts'e Cristo. <sup>8</sup>K'e nga tshóttijnako-nò, niyá xi kisijti-là mé xi kichiját'aà-na. K'e nga mé tsojmi xi kjòchjeén-na, jñà xita 'ndseé xi j'iì-ne nangui Macedonia kitsjaà-na. Nga majìn-na nga chjá koma-nò. Nachrjein xi fi-isa, tákó k'oaá s'iaàn. <sup>9</sup>Ngui koó kjoakixi-là Cristo koni tixan-nò nga mì yá xi kotichjoà-na kóhokji nangui Acaya nga ndaà síkíjna yijo-na kjoa xi tis'iaàn nga mì ton kisijé-nò. <sup>10</sup>¿Mé-ne k'oa xan-na nga chjà? ¿A koi-né nga mìkii matsjake-nò? Tíbeè Nainá, 'an 'ñó matsjake-nò.

<sup>11</sup>Tanga tákó k'oaá s'iaàn koni kisiko-nò nga sà ítjòn nga nímé kisijé-nò mé-ne nga mìkii tsjaà'nde-là nga kitsò jñà xita xi mejèn-là nga jeya síkítsajna yijo-là nga k'oaá tis'ín nchis'ín koni ngajen. <sup>12</sup>Xita koi, xita ndiso-né. Mìtsà kixi kjoa nga xita xi jè Cristo tsibíxáya-là. Ta konachan-né nga síkjatjìya-là yijo-là koni tsà jè Cristo tsibíxáya-là. <sup>13</sup>Kjoa koi, mìtsà kjoa xitse; tijè-ne xita neií síkjatjìya-là yijo-là koni jngod àkjale-là Nainá xi ote kji. <sup>14</sup>Mìtsà xkón tjín, xó k'oaá koma-ne nga jñà xita xi síxá-là jè xita neií, k'oaá s'ín síkjatjìya-là yijo-là koni tsà

xit̄a xi bénojmi 'én kixi-l̄a Nainá. Xit̄a koi k'e nga kjoehet'aà n̄achrjein-l̄a, k'oaá s'ín komat'in koni s'ín t̄jín kjoa ch'o xi nchis'ín.

### Mé kjoa-ne nga jeya síkijna yijo-l̄a Pablo

<sup>16</sup> Ìjngod̄ k'a k'oa t̄ixan-nò, kì k'oaá s'ín n̄ikítsjeèn nga mìkiì ndaà t̄jín kjoht̄sjeèn-na. Tsà k'oas'ín s̄ikítsjeèn, t̄jiì'nde-ná nga 'an, k'oa t̄is'ín ndaà síkijna it̄sé yijo-na koni s'ín xit̄a xi i'nga xi mì ndaà t̄jín kjoht̄sjeèn-la. <sup>17</sup> K'e nga kos'ín t̄ichjà, mìtsà k'oas'ín chjà koni s'ín sasén-la Na'è-ná, k'oaá s'ín t̄ichjà koni jngod̄ xit̄a xi mì ndaà t̄jín kjoht̄sjeèn-la nga t̄i'an ndaà síkijna-na yijo-na. <sup>18</sup> Koni s'ín k̄jìn ma xit̄a xi t̄jì'nà ndaà síkítsajna-ne yijo-la it̄'aà ts'e kjoa xi s'ín, 'an k'oaá t̄is'ín mejèn-na nga t̄i'an ndaà síkijna-na yijo-na. <sup>19</sup> J̄nò, bixón-nó nga xit̄a chjine-nò, t̄anga, ¿mé-ne biì'nde-là j̄nà xit̄a xi mì ndaà tsò kjoht̄sjeèn-la? <sup>20</sup> J̄nò, n̄ikjeiín-là xit̄a xi kjo'ñó s'ín-nò nga chi'nda 'nè-là, xit̄a xi ma-l̄a síkjehejno-nò tsojmì xi t̄jín-nò, xit̄a xi j̄nò beètoòn-nò, xit̄a xi ochrjekàngui-nò, koa n̄ikjeiín-là xit̄a xi s̄jts'iìn-'a isén-nò. <sup>21</sup> J̄nò, ¿kó s'ín n̄ikítsjeèn? ¿A masobà-na nga indaàkjoa kinìko-nòjen nga mì k'oaá s'ín kinìko-nòjen koni kisìko-nò j̄nà xit̄a xi i'nga?

Tsà t̄jín i'nga xi ñó ts'en s'ín nga chjà, 'an t̄ikoa ts'eén t̄is'iaàn koni s'ín ñó t̄ichjàko-nò. T̄anga ta k'oaá s'ín t̄ichjà koni tsà mìkiì ndaà t̄jín kjoht̄sjeèn-na.

<sup>22</sup> J̄nà xit̄a koi, tsà kixi kjoa nga xit̄a hebreo-né, 'an, t̄ikoaá xit̄a hebreo-ná. Tsà xit̄a Israel-né, 'an, t̄ikoaá xit̄a Israel-ná. Tsà t̄je-l̄a Abraham-né, 'an, t̄ikoaá t̄je-l̄a Abraham-ná. <sup>23</sup> ¿A chi'nda-l̄a Cristo-né? 'An, isaá ndaà síxá-l̄a Cristo. (K'e nga kos'ín chjà, k'oaá ngaya-l̄a koni jngod̄ xit̄a xi mìkiì ndaà t̄jín kjoht̄sjeèn-la.) 'An isaá ñó síxá-l̄a. Isaá ko k̄jìn k'a ótijnaya ndayá, isa ko k̄jìn k'a síki'on-na xit̄a, t̄ikoa ko k̄jìn k'a nga jye kjomeè sík'en-na xit̄a. <sup>24</sup> J̄nà xit̄a judío, 'òn k'a kitsjaà-na kjo'in nga tsakajá-na xox'ín xi s'e-l̄a kohòyo xi kaàn chrj'oòn ñijòn t̄jín-ne nga jngod̄ ìjngod̄ k'a. <sup>25</sup> Jàn k'a kits'iìn-na kjo'in nga tsajá-na xkajnchra j̄nà xit̄a; jngod̄ k'a tsibìnè-na ndajò xit̄a nga mejèn-la s̄ik'en-na; jàn k'a kiskaàjìin-ndáko-na chitso ya ijìin ndáchikon; jngod̄ n̄achrjein ko jngod̄ n̄it̄jen tsohótijnaj̄nà ijìin ndáchikon. <sup>26</sup> N̄it̄a ñánda nga ojmeè, ta kjojkón t̄jín kjit'aà-la. T̄jín kjojkón ya xajngá nandá ñánda nga otoa. T̄jín kjojkón



ts'e xit̃a chijé. Tjín kjojkón it'aà ts'e xit̃a xinguĩaa judío koa tjín it'aà ts'e xit̃a xi mitsà xit̃a judío. Tjín kjojkón ya jjiin naxandá, koa ya i'nde it'aà xìn ñanda tsjin xit̃a. Tjín kjojkón ya jjiin ndáchikon, koa ya jjiin-la xit̃a xi tsò nga xit̃a-la Cristo ma tanga mitsà kixi kjoa. <sup>27</sup>Kjin jchán xá kisinè-na xi 'ñó tjín, sà k'oaá skanda mìkiì ójnafè. Kisikjiaán kjinchrá. Sà k'oaá tsjin-na nandá xi ma 'yò, sà k'oaá skanda mìkiì tsoókjeen, kisikjiaán 'nchán nga tsjin-na nikje xi ójnakjá.

<sup>28</sup>Mitsà tà jñà kjoa koi xi komàt'ian. Tjín is̃a xi kj'eif̃ xi is̃a 'ñó tjín. Naxrjein nchijòn makájno-na kjoa xi tímàt'in kóhotjín naxandá-la Cristo xi 'an s̃ikinda. <sup>29</sup>Tsà yá 'ndseé xi ma indaàjjiin, t̃ikoaá 'an, ma indaàjjiin-ná. Tsà yá xi mejèn-la ótsji jé-la jngod xit̃a xi kj'eif̃, 'an ma jtike-ná. <sup>30</sup>Tsà mochjeén nga t̃i yijo-na ndaà síkijna-na, jè ndaà síkijna yijo-na it'aà ts'e kjoa xi mahindaajñaà. <sup>31</sup>Jè Nainá xi Na'èn-la Jesucristo xi otíxoma-ná, jeya kàt̃ijna ñit̃a kjé-ne, tíbeè-ne nga 'én kixif̃ xi tichjà. <sup>32</sup>K'e nga tsohótijna ján naxandá Damasco, jè xit̃a xi gobernador t̃ijna nga jè kitsjaà-la xá jè xit̃axá ít̃jòn xi 'mì Aretas, kitsjaà-la okixi nga kisikinda xotjoa-la naxandá nga

mejèn-la tsojà'ñó-na. <sup>33</sup>Tanga jñà xitá kisichját'aà-na nga kisikíjnaya-na nisiyá, ikjoàn ya tsachrje-na ñánda tix'á chrjó ndajó xi tjíndiì-la naxandá nga kiskinijen-t'aà-na skanda it'aà nangui. K'oaá s'ín komà-ne nga mikìl komà kitsobà'ñó-na.

**Pablo, kits'iì jngod-là nijñá xi kixi kjoa**

**12** <sup>1</sup>Nimé xi sikijne nga ndaà síkíjna yijo-na. Tanga mochjeén-né nga k'oa xán-nò kjoa xi tsakó-na Nainá k'e nga tsohóko-na, jè kjoa xi Nainá kisikichiya-na. <sup>2</sup>Beèxkon-ná jngod xitá xi fit'aà-là Cristo. Tjín-là te ñijòn nó nga kiìko Cristo skanda jè ngajmìl xi ma-ne jàn [ñánda tíjna Nainá]. Mikìl be tsà k'oaá s'ín kiìko nga yijo, a xi tà inimaá kiìko. Jè Nainá tíjiin-là. <sup>3</sup>Tanga be-ná nga jè xitá jè, kiì. A yijo-né, o a tà inimaá kiì, tà jngod Nainá tíbeè. <sup>4</sup>Kiì skanda ján ì'nde ñánda ndaà jchán choòn ján ngajmìl ñánda tíjna Nainá. Kiì'nchré 'én xi 'ñó xkón tjín, xi nijngod xitá koma s'enojmí-là. <sup>5</sup>Koni komàt'in xitá jè, jè-né xi ok'ín-là nga ndaà kíjna. Tanga it'aà ts'an mikìl ok'ín-na nga 'an ndaà síkíjna yijo-na. Tajngod tsà jñà kjoa xi mahindaàjñàà ndaà síkíjna. <sup>6</sup>Tsà ndaà síkíjna yijo-na [koni tjín kjoa xi 'an kijtseè ngajmìl], mìtsà 'én ská benojmiá, 'én kixií chjà. Tanga majìn-na nga ndaà síkíjna yijo-na it'aà ts'e kjoa xi kijtseè mé-ne nga nijngod xitá isa 'nga siikíjna-na ta ngatjì-là kjoa koi. Kos'ín kàtasíkinda-na kó s'iaàn, kó s'ín chjà, kó kó s'ín tisijchá yijo-na.

<sup>7</sup>Mé-ne nga mì 'an ndaà kótijna-na it'aà ts'e kjoa xi 'an tsakó-na Nainá xi jeya jchán tjín, kiskaat'aà jngod-na ch'in, k'oaá ngaya-là koni tsà na'yá nchajiin yijo-na. Jè xitá neií kijtseètòdn-na nga kisikasén-na kjo'in. <sup>8</sup>Ko jàn k'a bítsi'ba-là Na'è-ná nga kàtjaaxìn-na kjo'in jè. <sup>9</sup>Tanga jè Nainá ta k'oaá tsò-na: “Jè kjondaà-na yaá tíjnako-lè. Yaá okoaà yije nga'ñó-na k'e nga tsjìn-lè nga'ñó.” K'oaá ma-ne jè kjoa xi mahindaàjñàà, jè xi ndaà síkíjna-na yijo-na, mé-ne nga jè nga'ñó-là Cristo kíjnako-na. <sup>10</sup>Koií kjoa-là matsja-na k'e nga ma indaàjñàà. Tikoáá matsja-na k'e nga chja'on-ko-na xitá, k'e nga mé tsojmi xi chija-na, k'e nga fitjngui kondra-na xitá, k'e nga mé kjoa xi 'iín ma-na síkjaán it'aà ts'e Cristo. K'e nga ma indaàjñàà, k'eé isa ndaà s'e-là nga'ñó inima-na [nga jè Cristo tsjá-na].

<sup>11</sup>'An, k'oaá s'ín kichjà, koni s'ín chja xitá 'én xi nimé chjí-là. Tanga jñò ki'nè-ná kjo'ñó. Jñò xi tjínè-nò nga ndaà siikíjna-ná.

Nga 'an mìtsà ìsà nangui tìjna-là jñà xìtā xi 'mì-là jñò nga ìsà 'nga tìtsajna-là jñà xìtā xi tsibíxáya-là Cristo; nas'ín 'an nímé chíj-na. <sup>12</sup> K'è nga tsohótijnako-nò kis'e-na kjoatsejta nga tsakoð-nò kjoaxkón xi okó chíbā kō xi okó kjoa jeya-là Nainá kō nga'ñó-là. Kjoa koi okó nga kixì kjoa nga 'an-ná xi tsibíxáya-na Cristo. <sup>13</sup> ¿Jñò, mé xi ìsà nangui kisìkítsajna-nò koni jñà naxandá-là Cristo xi kj'eíí? ¿A koií majti-nò nga mì jñò kisijti-nò k'è nga mé tsojmì xi kichijàt'aà-na? Tijchàat'aà-ná nga nímé kisijé-nò.

### **Kó kitsò Pablo nga ìjngòò k'a tífikon jñà xìtā Corinto**

<sup>14</sup> Jyeé tijnandaà xi ma-ne jàn k'a nga kjíkon-nò. Tákó k'oas'ín s'iaàn, mìtsà mé xi sìjé-nò. Mìtsà koi otsjià mé tsojmì xi tjin-nò; kjondaà tsajòn xi otsjià. Nga jñà xìtā jchínga tjinè-la nga koiìtjò tòn xi kochjeén-la ìxti, mìtsà jñà ìxti tjinè-la nga koiìtjò tòn xi kochjeén-la xìtā jchínga. <sup>15</sup> Matsjaá-na nga sìkjèya yije mé xi tjin-na, skanda tìsikjè yijo-na kjoa ts'è inìma-nò. Nga ìsà ndaà matsjake-nò, jñò, ¿a ìsáa chíba matsjacha-ná?

<sup>16</sup> Kixìí kjoa, 'an, nímé tsojmì xi kisijé-nò. Tanga tjin 'nga xìtā xi tsò: “'Ñó maña nga konachan-la xìtā.” <sup>17</sup> Tanga, ¿mé xi kiskoðnachan-nò k'è nga kisikasén 'nga-nò xìtā? <sup>18</sup> Tsibítisi'ba-là Tito nga kiiikon-nò kō jè 'ndsè xi ìjngòò. Jè Tito, ¿a kiskoðnachaán-nò? ¿A mìtsà ngàsòn tìkoi-ne kjohítsjeèn tjaàjìin-jen, tìkoa tìkoi-ne ndiyá kixì tjaàya-jen?

<sup>19</sup> ¿A k'oáá s'ín nikítsjeèn nga yijo-najen tìtsanokjoàtji-jen? Majìn, tíbeè Nainá koi 'én xi tìtsanokjoà-jen nga Cristo tìtsajnakō-jen. Jñò ndí 'ndsè xi 'ñó matsjake-nò, ngats'iì kjoa koi, kjondaà tsajòn-nò nga ìsà tse nga'ñó kàtas'e-nò. <sup>20</sup> Makájno-na tsà k'è nga kìjchokon-nò tsà mì k'oáá s'ín tìtsa'ne koni s'ín mejèn-na. Koá 'an tsà mì k'oá s'ín tìs'iaàn koni s'ín mejèn-nò jñò. Koií makájno-na tsà koií nàchrjein-la tìtsabìxkàn-kjoò, tsà kjoaxìtakòn tjin-nò, tsà kjoajti tìjìin inìma-nò, tsà jò tsà jàn ya tìtsajna-là xinguiòò, tsà 'én ndiso tìtsabìnè-là xinguiòò, tsà xinguiòò tìtsanokjoájno-lá, tsà 'nga takòn tìtsa'ne kō tsà mìkìì ndaà tìtsajnakoo xinguiòò nga jngòò ìjngòò. <sup>21</sup> Tìkooá makájnoó-na k'è nga kìjchokon ìjngòò k'a-nò tsà Nainá sìisobà-na nga nguixkoòn jñò. Tsà Nainá sììkjindáya-na xi kjoa tsajòn nga kjìn ma-nò xi jye kjòtseé

binchaàtsjiodè jé nga mìkii nìkájno jé-nò kjoa tje xi 'nè kò kjoa chijngui xi 'nè kò ngats'iì kjoa ch'o xi 'nè.

**'Én-là Pablo xi fehet'aà-ne.**

**13** <sup>1</sup>Jè xi ma-ne jàn k'a nga kjiikon-nò. K'oaá s'ín tíhja Xojon-là Nainá nga tsò: “K'e nga tsà jngodè xita mejèn-là kiiindaàjiin jngodè kjoa, jò kò tsà jàn xita kochjeén xi koma tsjá 'én nga xkon kijtseè-ne kjoa xi komà mé-ne nga jcha-là, a kixíí kjoa, o xi majin-né.” <sup>2</sup>K'oaá s'ín jye kixan kixi-nò k'e nga ijchòkon-nò xi ma-ne jò k'a, kò i'ndeí nas'ín kjiin tíjnaa, k'oaá tì xan ijngodè k'a-nò nga jñà xi jé tshótsji nga sa íjton kò xi nchihótsji jé skanda i'ndeí, mìkii kojno-là nga tsjaà-là kjo'iín nga jngodè ijngodè. <sup>3</sup>An, k'oaá s'iaàn mé-nè nga jcha-nò, a kixíí kjoa nga 'an síkjeén-na Cristo nga chjàjiin-nò 'én-là. Mìtsà indaàkjoa Cristo; tíjn-là nga'nó k'e nga síxájiin inima-nò. <sup>4</sup>Kixíí kjoa jè Cristo, k'oaá s'ín k'en-t'aà krò koni jngodè xita xi tsjin-là nga'nó. Tanga i'ndeí, nga'nó ts'e Nainá tíjnakon-ne. Ngajen, k'oaá tis'ín indaàkjoa titsajna-jen koni s'ín komàt'in Cristo, tanga nga'nó ts'e Nainá kitsajnakon-najen koni Cristo mé-ne nga koma síxá-nòjen.

<sup>5</sup>Jñò, chít'aà inima-nò, tsà kixíí kjoa nga ndaà mokjeíin-nò it'aà ts'e Nainá. Ndaà chít'aà inima-nò xi tíjñò-nò. ¿A mìtsà tíjiin-nò nga Cristo tíjnajiin inima-nò? Ta jngodè-la tsà mìkii tsatojiodon koni s'ín kichit'aà-nò. <sup>6</sup>Tanga 'an, majngodè takoàn nga jchaá it'aà tsajen, ngajen tsatojiin yije-nájen koni s'ín kichit'aà-najen. <sup>7</sup>Koií kjoa-là bítsi'ba-lajen Nainá nga nímé jé kinchátsjiodè. Tanga mìtsà koi-ne nga jcha-najen nga ndaà bitjo-jen k'e nga chit'aà-najen. Jè-né nga síkitasòn jñò kjoa xi ndaà tíjn, nas'ín k'oas'ín kàta'ya-là it'aà tsajen koni tsà mìkii chíkjoa-najen kjoa xi otojiin-jen. <sup>8</sup>Mìkii koma kondra kitsajna-lajen xita xi síkitasòn kjoakixi-là Nainá. Ta saá k'oi-lajen nga'nó. <sup>9</sup>Matsja-najen k'e nga jñò tíjn-nò nga'nó, nas'ín ngajen ma indaàjiin-jen. K'oaá ma-ne nga bítsi'ba-lajen Nainá, mé-ne jñò nímé kjohítsjeèn chijat'aà-nò. <sup>10</sup>Tíkjiin-nò xojon jè k'e nga tákó kjiin tíjnaa-isa, mé-ne k'e nga kijchokon-nò mì tì k'oaá s'ín 'nó kichjàko-nò koni s'ín tíjn kjotixoma xi kitsjaà-na Nainá. Nga Nainá mìtsà koi xá kitsjaà-na kjotixoma nga 'an síkits'ón-jiin-nò, jè-né nga isa kixi kitsajnakoo 'én xi mokjeíin-nò.

**Kó kitsò Pablo nga síhixat'aà xīta Corinto**

<sup>11</sup>Ndí 'ndsè kò tichjaá, jè xi fehet'aà-ne, tsja t'è-là inīma-nò; kixī tītsajna; tījetakòn xinguiōo; tà jngòò kjohītsjeèn kàtas'e-nò, 'nchán tītsajnakoo xinguiōo. Nainá xi tjín-la kjoa 'nchán kò xi tjín-la kjoatjòcha kàtijnako-nò. <sup>12</sup>Nga nguì kōó inīma-nò tīixat'aà xinguiōo nga jngòò ijngòò. <sup>13</sup>Ngats'iì xīta-la Nainá xi i tītsajnakō-na síhixat'aà-nò.

<sup>14</sup>Jè kjōndaà-la Jesucristo xi otíxoma-ná, kò kjoatjòcha-la Nainá, kò Inīma Tsjeè-la Nainá kàtijnako-nò ngats'ioò. K'oaá s'ín kàtama.